

四庫全書

集部

欽定四庫全書

集部

學餘堂詩集卷一
一至五

詳校官檢討臣劉錫五

助教臣常循履勘

總校官庶吉士臣何思鈞

校對官編修臣沈清藻

謄錄監生臣陶鳴珂

欽定四庫全書

學餘堂詩集卷一

翰林院侍讀施閏章撰

四言

警志詩

洋洋景運六轡徂流爾征爾邁不我眷留維帝賚予靡
德不具既具既完逝不我顧拾穗維利不如躬耕束炬
夜馳不如蚤行鴟爭腐鼠鳳餐竹實翔視千仞下罕雖

匹懿我祖考乎道策驥腹我目我遑敢隕墜昔遊東魯
攝衣孔庭俯仰瞻聽實邇儀型匪哀匪慕泣涕如雨愴
如亡子初見父母軌臻回賜文企姬秦不慙爝火持照
千春隕霜警木世難厲德懷璧負塗智士不惑援則穴
果獺則祭魚誰為令人不勤是圖皇皇朝夕望畚心慄
如岸斯崩如虎將啞冉苦抱疴顏不待耆敬爾良時并
宵作晝

誡弟

弟閔巖弱冠方婚予行役在道愛而不見悄然以悲
將崇以成人之責俾纘我先緒焉為作是詩凡七章
我徂凜冬川谷逶迤霜披隕葉颼擊單枝憂來隨人顧
影沾衣翩翮鴻雁焉知我悲

嗟余負乘長懼顛覆難豚不逮俯仰心疚皇皇饘粥蒙
恥叢詬爾為令人食德維舊

維耜維耨三歲不穡一歲倍穫卒食乃力曰余先葉重
苞固植吾儕小子承流墜德防川則難涓涓可塞

既加爾冠載授之室爾邁爾勤如彼旭日春華既榮懿
茲秋實歲不我留遑敢暇佚

爾父吾父亦孔之勞昵我猶子矧爾屬毛懸車延頸靡
夕靡朝南陔可誦曷忍遊遨

共爾悠悠弼爾不腆既判既離懷莫由展人亦有言鄙
近矜遠匪耳之提我淚則泣

匪膏匪火炎炎自煎亦既戒止熾其燎原維憂速老誰
著誰龜雖則云爾胡遽弗思

中園

憂亂將作而子弟學無成也

中園有葵其葉沃沃朝復夕兮灌此寒綠霜露將至逝
恐不蕃心之憂矣云誰與言

中園有菊其葉粲粲日復月兮茁英有爛霜風將至逝
恐後時心之憂矣寧莫我思

中園有桂其葉幕幕歲復歲兮載累華萼霜雪將至逝
恐薄榮心之憂矣各念爾生

神搯虎詩

海陽人捕虎虎入陽山寺見判官像爪之像輒仆壓
虎不能動若神搯之者衆遂擊殺余讀其碑慕神威
德時新安歲饑多虎作是詩俾土人歌以侑神焉

虎欲齧人腎不畏神神赫且武視虎如鼠兔置在原虞
人如雨不孤不矢在廡之下孟賁失勇卞莊無功殪猛
薦馨擊鼓逢逢降凶自天實蕃厥族人饑虎餐粢婦塗
哭誰使渡河我不敢知神食此土捍災是尸載驅載殄

兼屏蠹賊寧我婦子豐我黍稷何以薦之擊豕剗羊何以酌之椒醴蘭漿有溪湜湜有嶽轟轟刻詩告虔則百我福

責子

老不廢學如燭繼日自愍末光猶勝闇室咨爾後生呆
呆初出齧齒燕荒耀靈將匿黃髮皤皤昨日如漆喪亂
蠶典帝怒人逸秋素雨霜百穀堅實岐路何多決勝寧
壹湛彼源泉川谷洋溢毋撥本根競華雕質羈鳥抱雛
中夜唧唧攬衣坐牀寒風感栗懲予薄躬祖德是述

學餘堂詩集卷一

欽定四庫全書

學餘堂詩集卷二

翰林院侍讀施閏章撰

樂府

將進酒

將進酒羅羣賢合四坐陳廣筵
烏錯蘭膏然弛珮帶
步華軒蠲憂端齊歡顏歌既醉
酣忘言舞陽阿揮朱絃
曲雜奏心相憐薄富貴樂當年
願更酌要列仙壽千春

白髮玄

短歌行

蛟龍可豢致之重淵神龜雖壽謀身不全禍福無兆天
地匪堅山則為谷水則為陸服食引年蟪蛄等促永嘯
無為含真守樸

少年行

少年矜任俠走馬探金丸朝從漸離飲夕交劇孟懽家
本五陵子遨遊雙闕間使氣陵五侯結客滿長安白日

報人讐純鈎血未乾官騎不敢追九衢側目看一朝見
天子請纓輸心肝南征舉百粵西使斬樓蘭英聲振海
陬勝氣浮雲端竦身光竹帛小勇寧足觀

隴西行

客有隴西行道逢江南客本自同鄉人相見各頭白憶
昔出門時新婦掩口啼嬌兒不解愁薄作堂下嬉夫婦
不相思父子何當離西風吹隴水堅冰凝我衣慚無一
觴酒為君解渴饑勿復言故鄉故鄉不得歸

東門行

步出城東門行行逢阿誰當時數萬戶夾道交華棖多
謝諸壯士斬木稱義旗閭井供一炬流血被九遠豈伊
秦與越相殘一何悲烏鵲厭人肉犬豕日已肥昨傳戰
城南矢石縱橫飛接刃爭須臾咄嗟成鯨鯢生無鷹揚
烈沒無黃鳥哀嗟彼為國殤掩袂酸心脾

豫章行

大木藏深山交阿蔽高天生與磐石固太古無歲年斧

斤儵見取長繩相鈎連推挽發千夫持作萬斛船昔也
凌崇岡今也汎廣川不惜離根株役我風浪間鉅材逝
將盡臃腫亦難全多謝中林草惆悵私相憐

代怨歌行

誰謂太行高陟之一卷石誰謂長城遠度之不盈尺新
人歡巧笑故人涕汎瀾對面成遠別何必間山川梅樹
生庭隅枝葉多憔悴梅酸不言好結子君勿棄

君子有所思行

端坐鬱愁思游娛騁良辰五侯從何來賓從皆貴臣浮
雲擁輕蓋接轂紛朱輪前騎鼓吹作後車燕趙陳餘芳
散綺服照耀九衢新朝華不待莫夕歡不及晨貴盛有
隕歇珠玉成埃塵會稽雖晚貴翁子終殺身誰知蟬冕
客長媿采薪人

秋胡行

秋胡行自魏武以還諸作者無與秋胡矣余為賦秋
胡本事冀世之類秋胡者一聽采焉

佳人獨處盛年明璫翠袖春妍君行不歸姑老采桑微
步桑間黃鳥一雙覘攬衣淚下漣漣駐馬翩翩誰予
色飛目奪心憐金夫不回妾盼踟躕惆悵玉顏白日晚
晚各歸相看慚愕難言妾心念君萬里君心忘妾眼前
蓄怨含嗔那忍捐情絕愛重淵長恨東西流水吞聲鳴
咽誰傳

上留田行

傷婦死於兵也

里中有啼兒聲聲呼阿母母死血濡衣猶銜懷中乳

門有車馬客行

門有車馬客言自故鄉來置酒列廣筵合坐臨高臺為
問故鄉事欲語中心摧海水鬪桑田陵阜為崩隕親交
滿里巷回首皆塵埃語罷各嗚咽淚落盈金罍人命信
朝露念舊有餘哀中宵倚長劍奮袂起裘衷

前有一尊酒行

前有一尊酒月出當我樓人生苦晝短賓從歡夕遊朱

顏理瑤瑟妙曲彈箜篌娛樂夜忘疲河漢已西流涼風
捲羅衣鬢髮成白頭萬變在須臾但願蠲煩憂誰當鞭
赤豹游戲崑崙丘

城上烏

城上烏有巢不棲中夜呼自言城南賊兵至殺人如山
烏得哺烏得哺且掩口城頭多健兒弓箭各在手彎弓
射烏折雙翼轉眼烏死蟻得食

陌上桑

沃沃陌上桑離離池中蒲南國有佳人窈窕世所無高樓臨廣陌皓腕颺輕裾兄弟盛車騎坐中夫婿殊春華艷金屋足不踰門樞日莫見烽火攬裳泣踟躕樹木雜輪困魏阪何崎嶇金雀墮艸間霜露沾羅襦傍有塚上松昨夜聞啼烏烏啼亦不雙雌鳴懷故夫鐵騎從東來悉索南山隅相逢村谷口險隘不容車力脅牽上馬肯復立斯須左手何所攜長珮雜瓊琚右手何所攜翠帳垂流蘇移我嫁時物顛倒繫馬頭婦言將軍令勿虐良

家姝健兒聽益怒此婦一何愚我已棄妻子從軍萬里
餘若不逐人歡所願誰與俱垂頭掩雙袂吞聲泣路衢

妾薄命

妾如木槿花朝榮愁日莫君如楊白花東飛復西去去
去何時還西度榆林關不怨妾憔悴念君非故顏

雞鳴高樹顛

雞鳴高樹顛征夫夜不眠披衣下牀去牽馬立門前妻
孀相訣別長征遼海間上山馬蹄滑渡河河水堅堅冰

有時泮浮雲何當還

烏生八九子

烏生八九子啁啾高樹間
西鄰彈射兒挾矢探金丸
東家白髮翁咄嗒多苦顏
投杖前抱持拉絕弓與絃
急難不相恤安用交豪賢
羽翮幸無恙飲啄何翩翩
被德良不訾報恩誰復言

邯鄲才人嫁為厮養卒婦

妾作溝中泥寧為篋中扇
扇棄猶自可泥污誰忍見
宿

昔傾城姿窈窕稱邦媛佩玉珥明璫挾瑟侍歡宴春華
辭舊枝榮悴中塗變未能自決絕摧顏就鄙淺洗粧卧
委巷夜夢猶廣殿卷舌懷故恩願化堂前燕

釣竿篇

持竿南山下濯足大河涯河流何湯湯魚尾何蕤蕤水
清小魚見水濁大魚肥龍子亦魚服太息中心悲芳餌
慎勿貪後車非所期被褐蹇獨處誰當知我為

浮萍兔絲篇

李將軍言部曲嘗掠人妻既數年攜之南征值其故夫一見慟絕問其夫已納新婦則兵之故妻也四人皆大哭各反其妻而去予為作浮萍兔絲篇

浮萍寄洪波飄飄東復西兔絲罥喬柯嫋嫋復離披兔絲斷有日浮萍合有時浮萍語兔絲離合安可知健兒東南征馬上傾城姿輕羅作障面顧盼生光儀故夫從旁窺拭目驚且疑長跪問健兒母乃賤子妻賤子分已斷買婦商山陞但願一相見永訣從此辭相見肝腸絕

健兒心乍悲自言亦有婦商山生別離我戍十餘載不
知從阿誰爾婦既我鄉便可會路歧寧知商山婦復向
健兒啼本執君箕帚棄我忽如遺黃雀從鳥飛比翼長
參差雄飛占新巢雌伏思舊枝兩雄相顧詫各自還其
雌雌雄一時合雙淚沾裳衣

采桑篇

種桑東谷口谿路何逶迤夕摘日薄莫朝摘露未晞不
自知妾苦但為愁蠶饑努力事織作奉為君子衣七襄

爛五色是妾手中絲裁縫稱長短被服生光輝振襟還
歎息含情當語誰新衣時復故盛顏日已哀十月隕繁
霜桑葉隨風飛願君為磐石素心無轉移

丘陵歌

陟梁甫兮馬虺隤瞻泰山兮雲不開雲不開兮日莫雨
回望魯兮逝何所

升天行

丹鳳一雙乘雲上翔俯視八極中路徬徨

解

下土小臣

心思太古言叩天門手擊天鼓雷雨晝迷噤不得語

解二

天間高高高不可即但見羣仙玉女侍側貨財千億

黃白

既成貨財千億役使鬼神玉女侍側見陰長生仙詩小臣昧死頓首言天闕清虛

安用貨財千萬億願丐下土小民作衣食

解三

仙人持節

問汝何所求小臣不願富貴願假赤螭遊戲十洲山無崩徙河海安流天子萬年兵革罷小臣魯鈍但當貧賤

長優游

解四

擬宛轉歌

露已零斗酒醉復醒
新聲曼曲歡自成
夜闌別促傷人情
歌宛轉宛轉悲且遲
願為南山石
硜硜心不移

二

星欲稀雙鳥驚不棲
野蠶作繭機中絲
纏綿辛苦為君衣
歌宛轉宛轉不能忘
沈憂令人老
歡樂夜未央

慷慨歌

耕田求食苦不得
息起而為吏
薄食我力念為良
吏何可得一貪吏受錢甘如飴
身安逸樂廉潔何為入無以

解

娛室家出無以游賢豪長者遺我心所思何不歸故鄉

與妻子共舖糜

二解

念為貪吏子孫愚受人嗤念為廉吏

子孫雖賢常苦飢嗟彼子孫誰何人丈夫各有志何當

為爾作計身受惡名為

三解

折楊柳歌詞

路傍執手別借問還歸時春風二三月吹殺馬上兒

二

莫作閨中婦寧作陌上塵願得隨風起為君霑羅巾

三

腰佩鹿盧劍背著錦襖策馬願馬肥出門願身強

四

鷄子橫天飛日莫有歸翼莫學菖蒲花無由見顏色

讀曲歌

憐歡含怨怒當歌斂蛾眉春風入桃李婀娜難自持

二

蟲生黃蘗中滿腹心腸苦儂向石城住歡作襄陽賈

三

庭前夜合花枝葉相重複雙鳥不肯棲汝從何處宿

四

歡情奈何許窺井不見底東家石榴樹累累自成子

五

持歌勸歡飲歡復強儂醉歌到懊儂曲墮儂一生淚

六

儂歌不言好薄言託情素為取歡顧儂故作曲中誤

七

他人亦憐歡儂無負歡事持釵刺儂心劃作相思字

八

別歡不能眠遠行斷消息羨殺青溪姑無郎罷相憶

九

玉井藕如船定生五石蓮斷錦不成匹當窗仰喚天

隴頭水

隴阪九折長水流去何極故鄉行當歸行子各努力

二

登高望所思引領迷處所征夫腸百結吞聲不得語

三

隴高寒氣蚤九月霑嚴霜落葉墮水底遊子悲道旁

四

隴頭水幽咽隴頭人髮白隴頭人回頭隴頭水自流

華山畿

郎心何太切使儂腸斷絕死合得同棺生嫁止同穴

泰山梁父吟

山高多烈風鬱鬱少松栢側足陵天門浮雲蔽碣石辛
勤紀封禪茫昧探玉策攘攘七十君一逝無陳迹上為
羣仙居下為萬鬼宅言當采芝食使我生羽翮攬裳不
及餐白日何促迫生非孔顏徒百年亦何益何況蕩陰
里空埋壯士魄

夜坐吟

長夜何漫漫天風吹我征衣寒人生一寸心安能糾結

千萬端野曠飛蓬不得息
引領高臺望八極星稀河漢
難欲啼記得前年別家時

望遠曲

歡從何處去妾倚中庭樹
不恨天涯遠恨殺門前路

彈箏曲

高樓夜靜流悲音願君千里知
妾心回風吹折餘音斷
淚落輕裾拂絃緩

烏棲欲奏烏啼曲烏啼啞啞傷柱促
遼陽十載不思家

秦箏那得比胡笳

雞鳴曲

喔喔復喔喔雞鳴茅屋角客行千里無此聲傾耳聽之
驚客情踟躕回勸主人翁勿留此雞鳴屋中朔方健兒
如雲屯城中掠盡來山村山深茅屋隔松筠但聞雞鳴
知有人妻孥被掠雞亦烹空庭破壁徒酸辛君不見長
夜漫漫夜相續啾啾人鬼同時哭

送春曲

江水瀾瀾草萋萋君行何速來何遲願留君兮君不知
回風拂樹庭花飛仙人會當老何事戀馳暉歌且舞送
君歸

棗棗曲

海陽有香棗蓋取二棗剝剝疊成中屑茴香以蜜漬
之好事者持為遠餉詢其始則商人婦所為寄其夫
者義取早早回鄉云予為作棗棗曲其詞曰

井梧未落棗欲黃秋風來早吹妾裳含情剝棗寄遠方

綿綿重疊千迴腸封題寄去憑君語
棗甘誰道妾心苦
閨中不識望夫山君看淚濕牀頭土

采麥詞

拊無衣倉無儲田家兒女啼呱呱
新婦采麥奉老姑
老姑髮白齒盡落有兒服賈母
藜藿前日風吹麥落花
今日雨浸麥生芽老蠶成蛾
又生子良人何不早還家

病兒詞

夜不得解身上襦晝不得織機中絲
問爾懷中兒嬌啼

一何悲君家門戶單兒女難剪我匹練市藥一九嬌兒
泣咽旋復吐中宵索母嚙枯乳烏啼啞啞天黑莫雨醫
當從何來門外水深三尺許

莫射雁詞

莫射雁雁孤不復雙夜夜哀鳴思故雄天寒野曠積冰
雪獨憂增繳聲不絕却驚羣雁來相欺吞聲抱義中心
悲流人遠謫多邊戍定有逋臣附尺素請君放雁且雙
飛憑寄書來還寄去

牧童謠

上田下田傍山谷三年播種一年熟老牛亂後生黃犢
版築將營結茅屋催科令急畏租吏室中賣盡牛亦棄
今年逋租尚有牛明歲田荒愁不愁前山吹笳後擊鼓
殺牛饗士如磔鼠牛兮牛兮適何土

荻港謠

江口泊處一夕水涌丈餘有宋公卧官舫夢神促曰
移船移船遽驚起船纜已解俄岸崩如雷宅舟皆破

溺矣

事在順治丁酉
十月十六日

港中艇子不可宿
夜半蛟翻浪崩屋
港口顏垣不可居
蛟來觸岸民為魚
我豈大編落何許
鼉駭鯨奔作風雨
幾人翻却橫黃金
有客移船聞鬼語

新安客

巍巍蠶叢路飛鳥不能度
中有新安客老向成都住
家
中存阿誰孰獨餘
故妻別時兒在腹
雌雄未可知
冉冉
二十春寄書無六親
忽逢遠來客云是新安人
往問敘

鄉曲同姓復同里握手稱弟兄何意乃父子飛蓬偶相
值哭拜不能起阿母望爺歸淚落東流水水流何潺潺
遊子及時還

獨山婦

枯楊巢野雀將雛苦不蕃勿為貧家婦被遣適它門夫
婿已決絕乳下癡兒存入門見牖贅阿母中心煩惱不
守故夫抱兒歸九原小兒不解事索脯無朝昏中庭有
苦李纍纍重墮垣開花自結實好惡那得論腹中復有

兒婦病卧草間力難致醫藥負薪得肉還阿姥知釜肉
故嗔背姥餐吾老乏藜藿新婦私饜餐婦慚矢皦日強
起聲暗吞持刀未割炙痴兒啼怒喧汝實衆所憎去去
慎莫前啖之却牽衣揮刃兒不全兒自有阿父事理那
可言里正白縣吏縣吏清且賢謂婦非故忍薄贖十二
緡富家有牛賣貧家止雞豚語婦女作崇鬻汝充官錢
生兒好還我慎勿復相煎婦答我免身理合奔黃泉我
雖若蒲葦一辱無再遷四顧鬱誰訴雉經挂桑園是月

兒當產腹悲空煩冤阿夫在南鄰媒妁方糾纏東家有
樵子稱貸相資緣作計論錢帛雜用青繩穿夫歸見婦
死悲憤填心肝門前舊井在舉身赴重淵四命爭須臾
老樹號烏鳶燭火燔鄧林蟻穴成長川里姬責細故盡
室悲摧殘傳戒後世人骨肉應相憐

海魚篇

東海有巨魚掉尾北海灣兩目若日月掣浪如連山朝
薄扶桑津夕過碣石還饕餮用水族吞舟喻百川憑陵

作風雨遊戲走平原潮回忽失水坐困沮洳間漁子揮
霜刀聚族橫相干修鱗賈洲渚鮮膾登金盤委身供啖
食口噤不得言生為蛟龍畏死為鮫鮓餐

抱松女

宣城秀才羅愷妻孫氏未笄從姑避兵匿松下兵獲
姑將殺孫亟出以身代兵脅之去抱松大呼曰死耳
義不可辱遂見害三日猶抱松不仆人稱抱松女云
松之青青兮女娉婷松之瑟瑟兮女貞一松可斷兮女

不可轉徹松根兮凝血碧永千古兮松化石

敝袴翁

身無完袴家餘紬素彼誰者翁嗇身窮莫誰使爾對吏
吏大叫怒倒索筐篋泣下如雨

解一

翁勿歎翁勿歎里中

嘈嘈環顧笑言平生親故無升斗今日傾筐持為官長

壽

解二

谷有牛羊園有梨棗老翁歸來戒兒食勿飽棗熟

不敢剥羣雀復來啄

解三

岸崩於東西則有步艸苦瓜甜

誰知厥故有日官人子白身充富戶

解四

貞孝篇

阮氏女未字而貞割股事姑以孝聞

日晝暝霜夏落女無夫空倉雀誰使露中花變作風中
籜與君約為婚妾未識君門為君奉姑舅未侍君箕帚
春風吹兮桃李枝山有松兮心不移死不難兮心獨悲
辛苦韶華空爾為

括蒼漁父行為周宿來太守作

東甌惡溪水中有九龍灣奔流急於箭駭浪高如山賈

客自覆舟漁父自垂竿青繩四角箱乃出蒲葦間中有
碧玉盤文犀兼木難藏麩生五色糾結青琅玕持詣府
中趨請為府主歡使君大嗟吁便可待賈還賈謝前致
詞理合歸上官物鄙不足取乞留碧玉盤揮手却賈去
長跪涕闌干還持餉漁父固辭非所安借問漁父家蓬
門亦不完高原有松柏其下生芳蘭直木無曲枝澄淵
無濁瀾使君與漁父千秋同一歎

梧井篇

哀二烈婦也癸未寇陷登封諸生焦陽長妻楊其弟
之妻牛並投梧下井以死焦追悼有梧井遺恨篇

青青井上梧湛湛井中水中有雙白璧並塋寒泉裏霜
枝老不枯巢烏啼不已它日井梧枝會應作連理

殘雪曲

南山之陰停白雲含愁結怨遲陽春願留清光持照君
黃鵠歌哀膠州韓烈婦張氏

黃鵠喪其雄孤飛起傍徨空林聞夜號月黑天雨霜

解一

偷生義不為上堂辭阿姥顧語黃口兒那能復惜汝

解二

獨繭不成匹單柯不成林海乾白石爛誰能轉妾心

解三

畢命青絲繩合歡黃泉路東海多烈風夜夜振庭樹

解四

憶遠曲

狂夫舊種辛夷花風吹花片落誰家妾手親栽女貞木
多年葉覆空房綠裁縫重寄征衣裳愁君恨君願君強
縱使來歸妾已老昔立東風私斷腸

終風篇

大風連日夜屋瓦聲洶洶孤枕旅思繁短檠霜氣重太
白一何高光芒勢飛動萬事總飄搖藏舟苦不勇廩粟
霑腐儒素餐實閒冗賜金酒可沽內顧慚且悚久安朽
鈍姿詎當徵辟寵鴻筆謝淵雲微言昧周孔雨雪一冬
無槁壤闕秋種歲事頻艱辛物情逾倥傯把卷手欲僵
敝裘爐自擁時序忽已闌坐增遲暮恐

莫相忘行

贈同時被
召諸公

人生良會不易得對面東西各南北干戈遲暮更驚心

相望那能見顏色
竭來文士如雲屯
一時待詔來金門
深山大澤皆羅致
申命重招勞

至尊枚馬紛紛皆博雅
漢世賢良稱董賈
彩筆雕龍徒
滿眼吾儕豈是悠悠者
從來虎鼠有定命
歌聲金石貧
非病縱令醉尉相挪揄
早被

君王識名姓
男兒苑枯聚散復何常
與君相見莫相忘

禽言

姑惡姑惡使儂朝炊夜汲
飢復采桑故嗔不操作
姑惡

自可小姑啾啾一何虐明年小姑亦有姑行當知苦樂

又

不如歸去碩鼠虎步疾藜塞塗老馬踟顧

又

泥滑滑泥淺可脫泥深不可拔兒家自有夫何當隨汝
苟存活細雨霏霏行路難長弓大劍相鞭撻

又

脫袴脫袴蕪田不耕辦田賦里胥夜來烹我雞燒我蓬

戶岸澗河深赤身走向何村去

又

婆餅焦阿翁惱孫兒
飢夜啼餅焦亦言好
南山高孫兒有母留賊
巢念欲往贖取耐可囊
無金錯刀

又

行不得哥哥白晝伏山阿
中夜渡河前有挾彈後有
張羅鷄子橫天飛雀死一
何多

又

提壺提壺有酒不飲當誰需
憂來不能語起步空庭周
四隅手持長髭鬚東家子
焦唇讀書不如西鄰子鼓
瑟

吹竽

學餘堂詩集卷二

欽定四庫全書

學餘堂詩集卷三

翰林院侍讀施閏章撰

五言古

述祖德詩

并序

序曰商周作詩推美先德見諸雅頌厥後詩人潘岳
撰家風之篇靈運重祖德之述義非私濫並著曩編
維我先王父履躬昌道講習之會十有四州肇義田

瞻宗黨學者至今稱不哀痛罹喪亂所撰遺書闕亡
先大夫孝友絕人益振令緒年不展德逾壯而卒行
雖信乎友生事不傳諸國史大懼隕沒各述髣髴用
告有道云爾

述祖

文學諱弘猷字允升學者稱中
明先生崇祀鄉賢及所在書院

王風久隕缺大道日寢微孔轍豈不邇百家爭路馳吾
宗肇東魯七十肩相隨在漢顯經學讐也博士師士句
揚其波先後同聲施世遠存本根後勁振前綏微言紹

天學高步追宣尼講肆羣響臻周遊遂忘疲闕先恢孟
辯排異塞韓旗磬折勞公卿閱聲蜚布衣輟餐餉宴士
商歌長樂飢德音昭俎豆奕葉流風徽

述考

贈奉政大夫諱啓
字曾省一字述明

前徽洵卓犖望古鬱長嘆惜不逮師孔翱翔洙泗間遺
言滿笥篋喪亂悲闕殘生世逢百罹營道良獨難純孝
踵曾閔潔志厲瑛璠纏綿九族義歎懇同氣歡努力沛
先澤遺構靡不完晞髮清川汜永嘯層峯端修塗苦促

算履順一何愆跪讀我父書俯仰涕潺湲珍木多早折
上士罕長年儒林闕傳記潛德當誰宣

詠古雜詩

黃河有本源傳自崑崙丘隄防苟不固汎濫將為憂章
亥度天地夸父觸不周目營萬里外心遺徑寸謀青陽
無留景仄逕多傾輶弱水不可航欲濟行無由喟焉賸
周道止策還優游

二

文明盛中古帝陞存土階相驅遞雕斲大樸無重回百
家既蠶起六籍歸秦灰世變不可極斯文為之灾莽騰
過千載作者橫九陔周行改岐路榮木忘故莠衆草既
已蕃霜雪終皚皚宣尼志刪述筮賁有餘哀

三

赤帝薄儒冠得鹿守文治斯文有本根過魯先孔祀墻
壁出遺經諸儒相鼓吹辭賦等優俳諷諫亦無諱孝文
寬賈生痛哭肆高議謗書些言史遷身辱書不墜風騷許

金...
卷三
怨誹煌煌四始義揚輝行樂人片言乃階厲吞聲拊缶
歌千春為流涕

四

種蘭思花多種瓜思蔓長姬周本忠厚弱祚逾夏商祖
龍亦何促黔首棲劔鋌炎劉襲餘烈吏酷如探湯朝爵
拜通侯夕尸棄道傍懿彼從赤松蟬蛻惟子房

五

玉樹生傾崖不如桑與麻抱璞貴不毀黨人詎足誇膺

滂如火烈剛直成疵瑕衽席視湯鑊甘死無咨嗟張儉
斗筭人脫身連萬家惜哉荀爽言棄擲如塵沙

六

卜式本助邊義請烹弘羊次公起錢穀奮身稱循良毀
家紓國難受爵亦何傷志士有逃祿抗迹獨高翔徵車
卧不起飲毒何倉皇奉錢贖徵聘咄咄譙君黃

七

平勃交歡日呂狐收族時陸生掉寸舌不使九鼎移生

才各有用所貴心相知純鈎或繞指神龍時守雌諤諤
洛陽生乃羞絳灌為

八

下士多所營上士少所偶寸心懷百憂豪末非我有豈
無千夫雄馳驚求白首達哉柱下言人與骨俱朽長跼
問猶龍賤子長年不青牛不可追行就尼山叟

九

浮雲如車蓋白日蔽餘暉衝颺起中路化作飄蓬飛行

行無根蒂持此終安歸
雍門自鼓歌薛公霓裳衣
千春誰不死朝菌良可悲
君看繁華子寧憶桑榆時

十

獨行良蹢蹢四顧何滔滔
富貴徒汨沒不如為客豪
朝為斗酒會莫為刎頸交
翔鷗凌廣漢奮翅求其曹
張陳既相厄蕭朱非久要
烈士寸心合萬事輕秋毫
兩人成一身長嗟左伯桃

十一

金史卷之三十三
卷三
詩人罕聞道栗里有徵士坦履就田疇遐尚追皓綺稱
心發高唱和歌者誰子右丞及左司異代分具體枯槁
何見嘲玄液非甘醴悟彼高山操絕絃良有以

十二

蒼鷹飽搏擊鸞鳳無棲枝
戈人慕彩翰弓繳將見欺
文章資叱咤高步多嶮巖
彌生求白刃黃祖安足嗤
輟翰就戎服彎弓西北馳
寶刀珠玉飾白馬黃金羈
常從霍驃騎不數李貳師
功成會天幸虎嘯不移時
今日萬戶

侯昨日羽林兒

十三

驅車適齊魯
飢渴求善士
觀濶洙泗濱
濯纓滄溟涘
美哉洵泱泱
大道亦孔迺
百谷何羣飛
天風揚海水
賓客競平津
塵埃生闕里
行行薊北門
滔滔長安市
橘袖雖佳樹
渡淮化為枳
衆醉思獨醒
轉歎於陵子

十四

昔遊嵩與洛
引領箕山岑
野曠風蕭條
落葉下修林
高

墳獨崔魏流泉清且深未知葬者誰父老傳至今萬乘
且不顧何況揮黃金矯立易為節達生難處心詰人冥
榮瘁貴不撓素襟垂旒如白屋楮冠樂鳴琴一為撫絃
歌太古留遺音

十五

春鳥多好音鳴我池上樓情人盈海甸夙昔偕宴遊言
當策我駕顧望還淹留出門阻虎豹安能歷九州芳蘭
易摧實壯士多煩憂平生絃誦地牧馬成荒丘何以歌

我懷五噫間四愁肉馬不可御翱翔驂赤虬欲挽天河
水俯澄濁海流

十六

雀銜松樹子飛落枯桑顛本自非骨肉寄生亦纏綿誰
謂同根株兩心不相憐勢利生白刃兄弟成棄捐孤竹
樂交讓二趙悲獨全拊膺感至性三嘆不能言

十七

三王御海寓禮樂急斯須如金歸大冶巨細成規模厲

階彼嬴氏任法仇詩書堂陞迷隔絕朝儀一何愚叔孫
采其弊綿蕞徒區區新聲傳樂府雅頌竟何如兩生不
肯行倔彊非世儒遺緒振河汾董薛復先殂長河日東
下蔓州誰當除嗟爾墻東叟望古久踟躕

十八

青陽敷淑景百卉爭葳蕤商風未及發花落餘空枝華
士狗物欲傾身驚文辭雕飾喪其璞少壯朱顏哀自古
多作者名在魂安歸生為鸞鳳吟死為猿狖悲獨言慕

揚馬誰與曾閱期

灌園

山園傍竹屋溪流
出襟帶讀書暇豫
多手灌引清瀨勿
言斯事鄙適與賞
心會樂矣桔槔翁
寧知卿相大昨日
涼風來今日桐葉
敗秋蔬苟失時霜
露將侵害辛苦滋
本根我生得微賴

栗園村

栗園嘉樹稀返景
前山赤客子無與
歡沿溪坐磐石朔

風一何怒翻巢傾雀雛其母來下視含舖聲嗚嗚口噤
舖不得宛頸久踟躕心憐腸斷絕相抱死須臾羈懷餘
感愴歎息霑我襦哀哉金九子彈射充歡娛

茗鴉行

避亂時作

山曲皆產茶故名

我有老祖母白髮披兩耳骨肉日零落慟哭依秋水眼
前看孤孫問是誰家子淚多早喪明艱虞迫莫齒白刃
何蒼皇驅我東南徙人與杖俱扶蹉跌入荆杞黽勉進
藿食哽咽受一匕男兒值亂世固窮未云鄙空鬱負米

心窮岫無甘旨

二

晨征發荒野薄莫臨迴溪秋水寒且急梁絕路無蹊妻
孥相怨怒濡足褰裳衣妾身不足惜所念懷中兒前山
猛虎穴日昃徒侶稀屏營不敢語怪我飢兒啼吞聲還
撥棄泣涕誰當知

三

遠赴南山阿言邁已百里樹杪見人烟解顏慰妻子捫

足息巖陰一坐不能起長跼乞主人廡下聊棲止親交
何雜選兔絲牽葛藟茅屋二三間風雨昨傾圮去去勿
踟躕落日下荒壘

采薪

客居久寄食他人為我炊感君不自德薄顏亦難施粗
衣裁掩肝微霰復已霏客心自多戚豈必寒與飢疎林
掃枯葉陰岫求枯枝攀條弄松雲引領眺京畿忽憶采
薇人淚下不可揮

宿山家

山行路自遠，孤客魂易迷。
莫鳥各歸去，啾啾向我啼。
暝色冒四野，小徑多蒺藜。
俯見林麓下，燈火臨礪蹊。
舉策一叩門，四壁風淒淒。
主人進粗飯，努力療渴飢。
來時經虎穴，宿處連雞棲。
平生戒垂堂，飄零緣鼓鼙。
客久望人憐，使我顏色低。
中宵萬感集，不寐聞霜雞。

懷友

嚴霜下喬木，落葉隨風揚。
飄搖轉無極，萬里越川梁。
客

遊何慷慨道路險且長仗劍久徒步雨雪衣裳層霄
置網羅健翮將摧傷破巢思危卵揮淚遙相望

二

中腸已斷絕之子歸無期豺狼蹲大路行人延頸唬
風拔山樹海陬多蒺藜仰天中夜嘆雙淚暗交頤時無
孫賓石誰當藏趙岐知命苟不憂努力待來茲

淳湖別邢景之

漠漠野田水新漲接平湖昔記漁家路今迷舊草廬村

前見野叟借問幽人居
君館湖水外為我夜回車
乾坤兵甲裏匏繫哀吾徒
燈前兩不寐歌泣窮悲娛
晨興當早發薄言繫我駒
牀頭開斗酒臨別烹雙魚
論交憶童邉流光忽以徂
歡難感別促登車悲路隅

過石白湖

征途遵石白停橈傍陰壑
霰集林臯踈潦收浦澍涸
菰蒲冒清淺魚鼈鬱蕭索
颼颼商飈來嗷嗷羣鷺落
臨集復回翔悲鳴避矰繳
中澤暗張羅殺機難可脫
勞生害

水族人物兩索冥黃鵠獨高飛矯翼何寥廓

采石

犀渚橫斷岸積石鬱嶙峋上有千仞峯下有萬里瀾明月墮懷袖側首天門寒長江一杯水借問幾時乾

客中獨酌偶和陶公飲酒

人生若奔馬促促竟何之崎嶇逐所欲寧似閒居時得歡日已足何為待來茲彭殤等朝莫下士心然疑但當樂相樂一觴聊共持

二

荒途遐且阻虎豹嗥前山驅車豈無感客子故難言時
把坐上酒仰首黃虞年著書莫我知吞聲誰與傳

三

在晉有高士佯狂遺世情沈醉自理照清芬揚令名名
豈中所熟聊得達此生非磐石固常恐風波驚丈夫
不聞道努力當何成

四

憂來不能坐靜言思奮飛自顧無羽翼
衰衷心轉悲日月不可語策足當何依
南山微雨歇浮雲各言歸其下有松菊
嚴飈獨不哀所樂誠區區素心貴無違

五

曲肱北窗卧松風為我喧羲皇不相待
樂向此中偏須臾明月出挂我檐前山
鳥鵲從何來孤飛尚未還感物一長歎
時哉無與言

六

挂瓢與扣角借問誰為是蛾眉易為嫉珍器易為毀大道本無名榮利徒為爾披裘且揮金君毋羨羅綺

七

少年愛游俠把臂尋豪英有時還獨坐側見古人情歲寒變枝葉瓊樹亦已傾形神自相賊孰以堅白鳴且盡一尊酒無為勞我生

八

元豹多隱霧潛虬養幽姿黃雀徒嗷嗷爭食且爭枝物

生各有尚介立斯言奇天地無心情高厚奚爾為哀彼
汗血駒屈首黃金羈

九

曠野涼風至颯然柴扉開坐見田疇綠愜我平生懷平
生願有託所憂中路乖風波一失足終日徒栖栖身在
世網中汗顏汨其泥道阻多窘步鄙性終寡諧驅車尋
舊轍前路幸未迷如何阮步兵途窮駕始回

十

我生在東南行行西北隅天地共羈紲孰敢辭修途長
飢不能飽萬里空馳驅四海自不足一勺自有餘鶴鷓
與黃鵠從君卜所居

十一

束髮事詩書謀身貴有道三十為壯年頽然已心老飲
酒不辭醉常恐雙鬢槁寸心得所向醉醒各言好元珠
歸象罔多營喪其寶君看雲中鶴恣意遊八表

十二

日月無停馭冉冉成四時昨夜庭花落青春與我辭美人惜遲莫感歎方在茲濟世有長策攘臂羞狐疑斧柯不在手將為龜山欺寄聲託浮雲吾道當何之

十三

桃源竟安在踪跡隱人境我病倦游尋獨醉不遑醒醉中有深義醒者莫能領士貴處域外豈見囊中穎纓組終塵埃素心自炳炳

十四

我昔避戎馬間關千里至日莫猶獨行有酒不敢醉宿
雁起我前驚翔失行次不經亂離苦寧知安樂貴萬事
一皆然食荼有餘味

十五

遠遊臨蓬壺叩彼仙人宅俯仰天地間倏忽皆陳迹人
生處駒隙祝年無過百仙人贈我藥鬢髮永不白冥性
得自然至道當矜惜

十六

猗惟予祖考步趨依六經徽音邈難續吾道竟何成鄙
哉陷章句局守不敢更中夜忽不寐攬衣步前庭微月
皎已沒孤鶴時悲鳴丈夫多坎壈勿令傷吾情

十七

青溪連我宅短棹隨輕風風吹一水香百花漾其中不
知人境隔忽與仙源通鴻飛既冥冥何事勞彎弓

十八

芳樹無久華榮名豈常得轂轉須臾間下士多所惑涓

涓蟻穴潰滔滔不可塞涇渭相波瀾殄瘁及邦國酒德
良可頌世事行當默

十九

乞食亦云好折腰何必仕叩門誰為開一飢少知己釜
甑自生塵妻孥為我恥我行聘四方我夢歸故里風波
在須臾日月不可紀飛蓬無根株中路何當止黽勉故
人心歲寒良足恃

二十

貧士生草間性鄙情亦真田父日往來樂此風俗淳長
吟發隴畝遺響多清新懷騷追屈宋好古軼周秦靡靡
六朝籍棄置如纖塵筆削非我事詠歌肆微勤不言著
作好聊得心所親耦耕既苦疲策駕空迷津開我牀頭
酒漉以頭上巾抗手呼陶公我亦醉鄉人

古意

和壁莫投鼠干將莫擊石投鼠壁先碎擊石劍先折結
怨不在深片語傷人心賈禍不在多爍火燔鄧林

二

莫作長柳枝路旁怨離別莫作合歡花閨中腸斷絕絲
染無復白髮白無重黑努力愛青春一失不再得

秋懷詩

客園俯華沼桂樹交南軒涼風中夕起零露淒已繁英
隄不急揚憔悴當何存視彼傷秋懷惻惻不可論寒夜
為我永百蟲為我喧寸心莫與照抱月倚高原

二

城頭已枯藿谷中尚芳草寒暑豈參差幽居顏色好繁
華驚逝波謀身須及早追歡思盛年埋憂思速老言從
陶令遊荷鋤同一飽

三

子真早挂冠伯鸞遠出關丈夫懷耿介依人慚厚顏樓
頭有明月三五向我圓所思不可見道遠心相憐夜遊
雖秉燭不如朝日妍莫齒雖同歡不如壯盛年

四

涼風吹帷幕蕭蕭攬裳衣賢愚同嗷嗷罄折交相唾蕭
曹弄刀筆衛霍開邊陲賈傳空前席柔翰揚歲蕤清濁
雖異流鬢髮颯已哀他生縱歡樂當復知我誰不見遼
東鶴自言丁令威四顧無所歸胡不冢纍纍

夢先母

閏章十歲而孤背母時甫三歲自傷孩穉不識母夢
亦無之已丑舉禮部歸次江北夢吾母破冢出如卧
初起且呼兒就語驚寤遂失聲書以誌吾痛焉

射策遊金門回鑣返故國故國傷我懷風木情慘惻中
夜夢慈親藹藹好顏色頽然出黃土衣裳徐拂拭自稱
為我母呼兒侍母側失恃在襁褓夢寐詎相識惆悵心
然疑流淚滿胸臆遊子良可悲精靈逝不測明發拜松
楸當聞母歎息

貽水東親舊

我昔來東溪談笑歡忘歸我今來東溪躑躅淚沾衣結
婚十餘載纏綿如兔絲東南秀諸峯握手欣招攜人獸

跡絕處拂石命我題情事兩娛樂日夕爭傾卮倉皇避
寇盜盡室相因依聞難畏相失減米同渴飢歲寒別貞
脆義重情不移荏苒二三載死喪踵相隨山原松樹下
新塚何纍纍存者各憔悴失聲向我啼予忝四方人聚
散安可知驅車烽火間時與親戚辭長恐西州路往來
踪跡稀

湯烈女詩

吾友湯衣白女也乙酉歲歸沈氏道被兵掠不辱帶

刃赴水中死

鬱鬱女貞木，矯矯歲寒心。托根自磐石，孤幹凌丹岑。寧受斧斤斷，不受霜雪侵。瑤琴倘見取，當聞別鶴音。

邊吏行

聞命已慟哭，相送各吞聲。腰下豈無組，佇立心屏營。天子拓四海，中原猶戰爭。百里絕烟火，千里留空城。開不敢入狐兔，何縱橫。莫從城烏宿，朝從蒿里行。官飢不得食，國稅有常征。軍書日夜下，飛輓十萬兵。令嚴甘就

死索賦無人耕一身委疆場哀哉骨肉情

送張八長季應武舉

寧為韉上鷹勿作且中兔張子虎嘯人青雲愁日莫家
世滿簪纓君獨鄙章句不辭萬里行遠逐沙場去白日
自西馳黃河自東注誰解戰士袍坐以將軍樹

舟中七月十五夜

水宿淹屢旬晚棹行未歇蓬窗西向開搖搖峯影沒蘆
中露欲零沙際木微脫蟋蟀鳴幾宵涼飈切人骨故鄉

當此時染盛薦秋節自予久行役頻致烝嘗缺薄祿不
逮親守官赴京闕簫鼓鳴中流夜靜聲幽咽惟見波上
鳥飛向山頭月

濟北懷故人

渚烟昏夕岸四望無孤城舟中一步地百蟲繞我鳴蟲
鳴爾自適不謂傷人情漁翁進雙鯉一壺聊自傾勿憶
故人夢昨夜宛平生觴酌聚鄰曲歡呼無停聲今夕復
何夕獨坐空屏營

學餘堂詩集卷三

欽定四庫全書

學餘堂詩集卷四

翰林院侍讀施閏章撰

五言古

舟次覓酒不得佳

我有數斗酒攜來自鄉曲
取醉不在多時時慰獨宿
昨成飲酒詩百觴苦不足
不惜十千沽恨乏尊中綠
因憶故山泉清冷漱寒玉
釀以渚田秫雜以籬下菊
開甕歡

新醅呼飲舊風俗淵明行未歸濁酒誰當漉

船破

鷓首何摧頽長鯨風雨至嗟爾萬斛舟致遠良不易高
帆入烟霄洪濤歷淮泗舟石忽相觸衣袂風無備拱手
呼鬼神將無河伯祟舟中有賈客相顧皆涕淚坐喪千
金貨萬里空憔悴我獨攜舊書沾濕有餘慰

奉使粵西答長安諸公送別

時予初入比部

朝謁承明廬夕發天南隅疲馬不遑息中宵脂我車故

人餞我酒贈我明月珠願君瘴癘地好愛千金軀再拜
謝君言雙淚沾衣襦桂嶺尚烽火豺虎交路衢不惜行
路難銜命綏蠻陬揮手望扶桑策駕長馳驅

蕪江除夕

遠別憂思長近阻憂思亟客舟傍鄉路歲除仍旅食燈
火明江干人聲夜不息勞勞日以老滔滔去何極兒當
學人語不得戲我側飄蓬懷故根常媿歸飛翼

壬辰元旦聞雷

守歲不遑寐披衣佇將旦仰視天氣柔東風客愁散不
願多歡娛但願少悲嘆椒觴未及莫霹靂崩江岸幽房
蟄蟲翻暝浦歸鳧亂十載困干戈頻年苦水旱天道或
杳冥人事已波瀾疾威從此始君子慎勿玩

湘潭阻風懷侯藍山韓振

夏舡歌且罷淚落水中央悲風觸頽岸鳥獸各驚翔引
纜牽宿莽夾路山蒼蒼美人在九疑孤榭留瀟湘巖谷
晝晦冥側身憂豺狼天南風日異戰後百城荒以予遊

子悲知君思故鄉

湖南行

浩浩湖南行悄悄悲修塗荒城時卧虎空村無啼鳥哀

我同袍子

時守令多
余同年友

惴慄官此都悍俗荆蠻接遺黎

魍俱白骨為瓦礫青燐然丘墟王師跨嶺表鎧甲簇蒼

梧供億日以繁膏血日以枯不惜腰磬折鞭撻銷肌膚

官貧易得罪生死爭須臾豈無一循良七載無遷除愁

凝九嶷烟魂遊洞庭湖長跪乞大吏但放歸田廬直指

古仁人

謂李侍御敬

攬轡立踟躕自出橐中金買犢開榛蕪

丈夫萬里志奮臂拯艱虞庶幾繪圖獻一使蒼生蘇

遊朝陽巖洞

我尋愚溪路值此巖洞幽靈湫鳴石底山木風颼颼入
洞展几席飛觴左右流春光崖際莫暑氣潭上秋魚鳥
泳清泚宮觀臨滄洲長懷棄圭組散髮依林丘西亭有

遺咏日落還淹留

子厚有朝陽西亭二十韻

抵桂林

燕山發凍秋桂林來莫春勞勞淹歲月悠悠忘苦辛山
多高樹稀巖石何嶙峋清江淡白日芳草薰遊人鉤輶
越鳥叫縱橫虎豹羣帶甲一何繁城郭少遺民憑高不
可望歎息當誰陳

二

鬱蒸苦炎塞春雨何淒淒寒暑無定候裘葛常同時弭
節越王山望古伏波祠山中有叢桂枝葉紛離披采樵
盡為薪芳華不自持攀援思美人中心彌渴飢

雨中登劉仙巖同王德一侍御同年胡天聲陳鳴

遷王德邁諸公

舊傳劉仙翁煉丹處後有施公
恭其風亦棄官去并祀巖洞中

靈巖烟雨交幽洞白日莫欲尋赤松子遂枉青雲步
谷口歇鳴騶崖端倚佳樹神仙此窟宅泉石恭回互
劉公既蟬脫施子亦鳳翥采藥窺天門躡跡向烟霧
共作逍遙遊始知束縛誤勞人在塵網何異置中兔
于役轉飛蓬抱疴畏朝露庶幾企高軌解組得微悟
日落衆鳥歸

躊躇下山路

夢友

壬辰四月六日舟次昭江夢亡友祖洲從車騎過余
言別狀告趣裝之官者且曰道里悠長單車之費願
假九十緡予傾橐佐之不及詢其所往覺而流涕作
夢友

高義成往躅吞聲泣孤墳幽魂闕塞來萬里接清芬衣
冠一何偉車蓋翔浮雲躊躇征路長握手不忍分解我
橐中裝造次展殷勤死別已八載悲鳴思故羣鬼神錄

正直浩氣凌秋旻雞鳴曉霧白開戶空氤氳

客舍作

草生大路傍春日少芳菲人生車輪間壯士無光輝道
逢一心人下馬語依依綈袍豈必解感注自霑衣不見
當路子棄我忽如遺荒塗多虎豹行子歸無期停予萬
里車尊前聊共持匪為飢與渴故人相見稀

東粵客夜

南園蟋蟀鳴西澗蟋蟀入炎方正暑節秋蟲一何急中

宵指北斗知為舊京邑蠻陬多反側旌旗暗原隰城野
兩相傷白骨痛何及誰知行路人日洒楊朱泣

過泰和縣

日落泰和道津吏不我迎城下猛虎跡城上啼烏聲此
地賊如蝟人家荆棘生縣官入高砦飢卒守空城賊來
卒亦走迅疾如流星空持使臣節歎息淚沾纓

粵西亂後懷平樂太守尹奠階同年

予本卧疴人乃乘相如傳浩蕩越江湖迢遞歷鄉縣分

符值朋舊天末各眷戀就中有尹生才名冠吳甸素心
炯白日紫瞳掣流電街命守昭州魑魅日中見飲水愁
毒淫官庖無完饌藩鎮善督責汗顏甘訶譴誅求義不
忍出質到妻釧播遷兩及暮玄髻已變聞我萬里來
握手驚拭面洒掃先下榻契濶共餐飯煦沫及僮僕敝
衣為補繕傾索治我裝左右色無倦二子汗血駒齧齒
挺英彥論文受甲乙悲歌雜歡宴移觴松樹根濡翰鸞
鶴研陶陶夜未央羽檄喧轉戰桂嶺走鯨鯢昭江紛組

練城荒無駐卒路阻絕鄰援爨婢罷晨炊勺水不下嚙
我行已倉皇君意反繾綣中厨呼酒漿妻孥淚如霰餞
我登竹舸揮涕苦相勸封疆我則死風鶴子當遠訣別
水聲中纜解急飛箭瘴雲落日昏耳目驟驚眩但見逋
逃人男女相蹂踐別來斷消息枯蓬各飄轉蒼梧殺氣
高銅柱妖氛纏巢卵得無覆頸血恐已濺詩書故多難
鬼神不錄善長號敘悲憤戰地儒冠賤

琴溪

丹巘臨清溪飛梁冠殘霧古有馭風人跨鯉騁高步騰
身得所歸滅跡不回顧纖鱗蕩春波幽光耀寒樹嬋媛
女蘿深迷離仙隱處逝矣聖者懷樂哉濠叟趣道傍者
誰子矯首有餘慕

皇甫氏苦節詩

皇甫為旌陽王善安婦年二十舉一子夫坐事枉死
命速嫁以存孤泣對曰遲我十五年俟孤立而報君
地下或奪之急斷指血淋漓十五年後卒如其言死

嗚呼古烈女懷霜心所安苟活義不忍求死良獨難凜
冬盛殺氣蘭蕙無彫殘孤根既已植銜哀摧肺肝死訣
言在耳念彼泉下單烏啼愛長夜寧知天風寒

與客登敬亭

看山真不厭踏葉響空林我友嵇阮徒長嘯同登臨荒
祠依古木傑閣冠丹岑城陰淡窈窕塔影標蕭森青蓮
去已久白雲留至今精靈來髣髴鸞鶴有遺音天高遠
峯出木落寒泉深麻姑東在望揮手可招尋

觴錢聖月分得謝字

息心寡儔侶養疴日多暇官貧厭章句轉欲謀耕稼錢
子滄海人千里倏命駕坦懷敦夙歡藉州薦尊竿撫往
成痛哭憤今多叱咤晴鳥弄青春寒猿泣長夜屈指宛
陵遊故人半徂謝鬱紆懷古心踟躕北樓下

哭石湖邢益貞

送別臨寒溪巖飈莫蕭瑟相訣豈爾時永痛纏愁疾平
生卧石湖握瑜長抱膝杖策稍出門蒙袂返蓬室蘊此

憂生嗟彌促引年術英華中路零篇籍恐遺失素車帳
有違宿草涕仍出諒直懷古歡論文舊儔匹篋中有遺
草逝將揭白日怵怛念久要萬事從茲畢

涇川桃園作

寒裳陵亂流理策遵修渚巖梅尚餘花溪桃紅半吐飛
霞散平疇錦浪生別浦雜卉既嬋媛危亭亦森舉林豁
見山寺鳥喧作人語昔來紛彥會舊有水西書院學者甚盛事往餘
榛莽流目覽衆妍登高當孤嶼撫物歡在茲仙源復何

許

松筠圖篇美家孝廉元引母徐太君

吾家有偉元久廢蓼莪詩手持篋中卷嗚咽前致辭念
母實劬勞腸斷淚交頤賢齊伯鸞婦貧窶黔婁妻到股
充藥餌屑榆療渴飢柏舟既早汎熊丸心苦悲書從口
中授淚濕機上絲寒燈暖四壁霜月照單帷有女亦早
孀盛年處中閨齊心共孤影雙節流芳徽生無程第榮
沒無簪餌遺徒深烏烏痛哀哀中夜啼寶茲松筠篇永

與金石期

過翬嶺

崇岡鬱峻嶂鳥道繞山腹仰探白日短俯瞰陰霞伏魚
貫度行人疲馬艱躑躅春晴多好風吹我巖壑綠農耕
嶺上雲婦飯溪中犢羈心曠登陟瘠土見風俗華陽靈
蹟闕杖策尋石屋

齊雲巖

裂石通天門陵嶽構菌閣雲入巖下飛瀑從松頂落粲

金大... 卷四
聚香爐峯丹霞起陰壑七曜內盤旋百靈外回薄蒼顏
有五老聯翩勝廬嶽低昂向予笑神仙或可學

尋紫陽山遇雨

沿溪路不盡忽接溪上山溪山相與綠黃鳥時關關懷
古企靈蹟高步思追攀瞻望弗可及坐石聽潺湲

落石臺

清溪橫斷石獨障水東注瓠罇左右浮坐卧魚龍聚捨
策漾輕舫延目滄洲趣繁吹激潺湲陰霞改晨莫仰視

飛來亭參錯入烟霧河畔可投竿賞心誰復遇

書富瑯塔上

浮圖跨天漢海陽不盈掬萬象歸空蒙環溪漲新綠城
郭何參差蔽虧半林木遙看白岳雲天際來相逐

贈吳雨若

丹霞照暘谷芳樹榮東軒令節思佳人獨嘯誰與言飛
來雲中鵠顧我何翩翩天路豈不高戢羽深林間咬咬
鳴清風餘響溢長川慷慨敘心曲涕下如涌泉

山家阻雪

東臯艸木綠杖策尋丘園臨崖坐茆屋蘿蔓緣東軒既
歡雲木霽遂暢桑麻言夕霰響林薄晨雪蔽川原時見
南山鳥下我檐際凍枝折巖樹膠壑枯泉源永懷松
與柏歲寒安可諉

飛來峯至冷泉亭

夕宿遵水齋朝雲爛巖阿奮袂越修坂緣岡瞰頽蘿林
洞就詰曲石巘累嵯峨虛無鷺嶺言宿冥禪客過丹崖

瀉土乳空磴森喬柯天地成斷鑿智巧一何多層顛睇
滄海下澗涌清波坐石濯塵纓晞髮凌飛霞詎爭濠濮
賞目寓自為歌

禹陵

隨刊數九土言登會稽山升遐豈此地高陵鬱嶢岿豐
碑紀四載侍從列千官山椒聳殿闕朱甍摩蒼天馨茲
俎豆潔哀我民力艱窳石既磨泐畫棟猶飛蹇

陵上有
定石又

傅廟中畫棟嘗飛出赤珪藏日月金簡非人間亮無龍威文科斗

誰與傳

星峯亭作

亭前有坑始皇所鑿以泄王氣

觸雨陵山椒陟巘展朝霽危亭冒峴嶽漲水明埤堦左
曳羲皇車右把天姥袂白雲何連蝮髻髻有根蒂秋草
粲春華山鬼善凝睇坑勞秦帝鑿嶺想謝公憩豁達萬
古情流觀四山際

剡溪乘漲下娥江

秋霖漲千山孤遊倦歸路揚帆越郊垌漾楫陵岩樹茫

味顏岸村皎潔遵渚鷺楓葉雖未丹林景已垂素側見
東山好尚想謝公步山開窈窕顏并留歌舞處懷古心
賞交既往難可遇碑捫幼婦辭風捲老蛟怒嗟爾一江
水千載美無度

武林贈徐世臣

出門思求友眷德良寡儔念子瑚璉器窈窕貴林丘振
策西山麓濯纓東海流吐言爛雲漢長嘯辭公侯十年
阻契濶交臂盡綢繆出處道則異忼慨心相謀遵陸騁

高轡涉水思輕舟安得采芙蓉從子俱遨遊

懷顧與治

商飈吹好月惠然開我襟
髣髴故人至延望無形音聞
子嬰世患京口久滯淫
窶賤良足安遘閔故難任
喬木

半摧殘

時邢孟貞
新物故

誰為瓊樹林抽簪吾未得
念爾丘中

琴

過倪園弔文正公

亭館何玲瓏合沓無終始
高榭累丹岑修廊照清泚
鑿

築成川巖高深信具美謝傳東山宅康樂始寧里聲名
蔽天壤丘壑情所止抗節何從容正氣森岳峙披髮白
雲鄉魂歸或倦此便娟想芰荷蕭瑟瞻松杞美人不可
見揮淚長川汜

訊張木弟病

秋蘭出中澤江流深且寒涼颭何浩浩芳華日已殘上
士多苦心食梅不言酸著書成疹疾營道邁憂患願從
安期生跪受藥一九遊涉歷五嶽輕舉餐琅玕達生有

餘樂無為傷肺肝

剡中寄會稽家太守長野

時余將
赴京

戒楫若邪濱溯洄剡溪道川涸陟層岡杖策紆林表長
風萬里來吹彼雲中鳥高翮不易息哀鳴傷懷抱

二

連岡無窮畛歸雲有餘戀今日締衣涼昨日裁紈扇歲
時寒暑侵人情睽合見判袂未盈旬懷思淚如霰

寄山陰徐伯調

柯亭有長笛爨下有遺琴玄覽無虛覲達人多苦辛物
亦感人情忼慨揚好音夙遵剡溪道躡屐嵇山岑昔賢
邈徂謝蕭蕭空竹林商歌一相和川谷響悲吟清飈赴
喬木鷺鳥翔層陰嘉會良不易凝眺沾衣襟

懷徐世臣丁飛濤

蜻蛚鳴東僻微風颯已涼二子何矯矯德音藹難忘流
光日苦短離憂日苦長珊瑚出海底皎若升扶桑島嶼
皆照耀丹霞隨風翔褰裳欲往從豈曰河無梁懷思亂

心曲永歎不成章

赴都答蔡大美及同里諸游好

羲和凜莫節白雪積晶晶雞鳴啟重闕嚴駕一何早
祖帳供東門送我長安道長安萬里餘雙闕浮雲表
越鳥棲朔風羽翮豈長好盈觴日在御孰緩憂心掬

二

雙鶴來雲間嘹唳我東廂翱翔得所欲豈曰謀稻粱
清歌轉善謔嫵婉紛難忘誰能舍茲去雨霰零衣裳今夕

曲水湄明發大河陽

三

巾車佇修坂眷我同懷人同懷二三子齊轡揚芳塵寒
華俯六葉躡軌追典墳瞻前恐不逮努力良已勤園廬
復相望榮木無冬春多君歲寒意勗我以先民列爵非
所志柔翰垂清芬

四

白雲出深谷搖搖離舊山僕夫競前路客子心纏綿雖

康東方粟猶赧祖生鞭雅執馮公戟未草子雲玄功德
有消隕何況揚空言所念平生交幽棲圭篲間鼻犢足
常溫安用狐白鮮各勉金石歡珍爾桂樹篇

迷樓舊址

今為寺閭閣前有沼
相傳即摘星樓處

蜀岡何迢遞宮觀還縹緲一人娛耳目百禩傷懷抱複
閣改招提摘星騰寒沼土花蝕寶曆玉樹翳荒篠重城
蹠血餘萬戶吹蕭少當時聳金屋飛薨礙高鳥妍卉無
冬春酣歌昧昏曉山川無故物往者迹已埽迷離螢火

飛蕭瑟垂楊道

稷下吟

總轡踰營丘振綏度淄川請為稷下吟清商激繁絃海
岱夾都會冠帶紛蟬聯華轂隘廣陌修岡亘星躔錫茅
肇鷹揚分流暨諸田英辟既襲跡令佐乃駢肩技擊奮
仗劍文辨競拔天士女鬪雞狗魚鹽充市廛長筵海錯
列珠履何翩翩一朝委逝波蕭條無人烟古墓巢黃狐
崇墉號饑鳶延頸呼鮑叔拍手招魯連寒雲睇絕島落

日悲牛山升沈皆滅景但見空名傳萬古更銷歌方來
徒泣然

一 悼亡

為亡室
梅宜人

汎汎驚征路行行辭故廬稚子集高堂賓御臨長衢回
首還入戶顧望立踟躕昔別烹伏雌今也歸黃壚笄珈
竟何益荼蘼良已劬迅商揚幕帷積雪曜庭隅庭樹有
巢鳥誰言非爾雛微芳易飄忽傷哉隨化徂

二

化徂亦何怨同衾不相訣煩疴淹節候愁思中腸結簪
珥逆後人縞綦猶皎潔兒女在重泉母子久離別逝者
會有聚生者從此絕連宵入我夢語笑忽哽咽顏色逾
平生愴怳益悽切逝將最無生沈憂一朝輟

赴京道中作

四野浩茫茫千里無異壤心與逝景下目送歸雲往霖
雨不終朝潢汙已決漭軌迹亂縱橫城館何板蕩嗷嗷
歸雁吟遲遲春草長青陽無惠風長宵皆厲響砂磔一

飛揚白日失清朗征夫易感觸悵望絕心賞嗟爾當塗
子游宦忘鞅掌

二

陽景敷柔條道傍列枯樹充君攀折多朝榮變頽莫客
行指薊北野曠暗層霧嚴裝戒鳴鏑晚食臨中路登頓
窮川梁衣弁改緇素日昃未停軌駑馬鳴相顧帝鄉伊
可懷丘園良可慕苟乏神龍姿詎當猛虎步

北海作

結軫之皇州滯淫北海甸城郭何蕭條陽春多雨霰修
阻棘如蝟日月成奔電河流潤原隰草色吐微菁渺渺
佳人期摇摇徒侶倦星辰異分野山川畫鄉縣征夫懷
故鄉終古誰能變

皇天篇

憫饑民也都城外數百里積霖成壑民匍匐轉徙時
逃人法重州邑閉關不敢納死者相枕哀聲動天故
為之籲天云爾

皇天眷萬物雨師寧不然神州輦轂地高阜成山川蕭
條何所有饑獸竄頽垣嚴冬邊雪至朔吹先苦寒分與
藜藿絕敝緼復不完遺黎伏路側聲出不能言矯首望
樂土重闕限我前眼前一步地艱於太行山逝者葬魚
腹生為豺狼餐嗷嗷澤中雁飛飛雲漢間飲啄雖失所
天地何其寬感物一撫膺淚下如奔湍

次平原

客行所行道日夕次平原愁鴟鳴雉堞頽颺櫺軒振

衣三歎息望古淚潺湲賢君昔食采英聲翔九天定從
存邯鄲長跼謝魯連偶看覽者笑彼婦亦何愆殺之亦
已甚矯情稱其賢蕭條黃沙起慘悴遊子顏斯人不重
見忼慨誰與言

途中望西山

黃沙滿襟袖客懷無一展時夢江南遊青山情不淺今
晨覺爽氣悠然見絕巘巖巖既峻嶒邈何曠緬塞垣
千里接白雲共舒卷霽色落長安空翠無近遠賞心誰

與諧靈境終當踐雖無薜蘿衣一洗風塵眼

學餘堂詩集卷四